

INFO.



Općina Novi Grad Sarajevo

Vanredno izdanje

***Više od 30.000 građana uživalo
u raznovrsnim programskim
sadržajima***

26. TRADICIONALNA MANIFESTACIJA

**NOVOGRADSKI
DANI 2024**

od 30. maja do 30. juna



Naši maturanti

VAŽNIJI TELEFONI I E-MAIL ADRESE:

Služba za poslove Općinskog vijeća

033 291-130, fax. 033 291-271
vijece@novigradsarajevo.ba

Služba kabineta Općinskog načelnika

033 291-100, 033 291-103, fax. 033 291-278
infonyograd@novigradsarajevo.ba
ngsa@bih.net.ba
aminapress@novigradsarajevo.ba

Služba za privredu i lokalni ekonomski razvoj

033 291-111
privreda@novigradsarajevo.ba

Služba za urbanizam, imovinskopravne, geodetske poslove i katastar nekretnina

033 291-120, fax. 033 291-224
urbanizam@novigradsarajevo.ba
033 291-279
imovinska@novigradsarajevo.ba

Služba za opću upravu

033 291-233
opcauprava@novigradsarajevo.ba
maticniured@novigradsarajevo.ba
cern@novigradsarajevo.ba

Služba za obrazovanje, kulturu i sport

033 291-117, 033 291-281, fax. 033 291-170
obrazovanjeirazvoj@novigradsarajevo.ba

Služba za boračka pitanja, rad, socijalna pitanja i zdravstvo

033 291-237, fax. 033 291-164
boracka@novigradsarajevo.ba
033 291-173, fax. 033 291-173
radisocijalnapitanja@novigradsarajevo.ba
033 291-306, fax. 033 291-281

Služba za investicije i infrastrukturu

033 291-116
investicijeikomunalno@novigradsarajevo.ba

Služba za finansije

033 291-234, fax. 033 291-319
finansije@novigradsarajevo.ba
ngsafin@bih.net.ba

Služba za zajedničke poslove

033 291-107
sacira@novigradsarajevo.ba

Služba civilne zaštite

033 291-114
cz@novigradsarajevo.ba

Služba za lokalnu samoupravu

033 291-344
mz@novigradsarajevo.ba

Služba za inspeksijske poslove

inspekcija@novigradsarajevo.ba

Pravobranilaštvo Općine Novi Grad Sarajevo

033 291-162
pravobranilastvo@novigradsarajevo.ba

INFO.

Vanredno izdanje



TELEFONI ZA HITNE INTERVENCIJE:

Higijenski servis

061 229-940

Dežurni inspektor

061 229-949

AUTOR I UREDNIK: Amina Vatreš-Nezirević, dipl. žurnalist

GRAFIČKI UREDNICI: Vahidin-Nino Pršeš, dipl. inž. informatike

Nihad Spahić, dipl. menadž. informatike

FOTOGRAFIJA I DTP: Samir Kadić

IZDAVAČ:

Općina Novi Grad Sarajevo

Tel. 033 291-100, 033 291-313

E-mail: ngsabih.net.ba

www.novigradsarajevo.ba



Općina Novi Grad Sarajevo



PRESS KONFERENCIJA

Predstavljen Program 26. manifestacije "Novogradski dani 2024"

Više od 30.000 građana uživalo u koncertima, pozorišnim predstavama i drugim kulturno-zabavnim i sportskim događajima

Program 26. manifestacije "Novogradski dani 2024." u organizaciji Općine Novi Grad Sarajevo, pred mnogobrojnim novinarskim ekipama, predstavljen je široj javnosti, na press konferenciji koja je tim povodom održana, 29. maja 2024. godine u zgradi Općine. Bogat kulturno-zabavni i sportski program, kao i program obilježavanja značajnih datuma i ličnosti iz perioda agresije na našu zemlju predstavili su pomoćnica općinskog načelnika za obrazovanje, kulturu i sport Adisa Šuman i Tajib Delalić, pomoćnik općinskog načelnika za boračka pitanja, rad, socijalna pitanja i zdravstvo.

U okviru manifestacije održani veliki koncerti zabavne i narodne muzike, večeri sevdaha, moderni ples, poetski susreti, izložbe, festivali folkloru i predstave, kao i druženja, zabave za djecu i odrasle, te drugi kulturni i sportski sadržaji

Ovogodišnja manifestacija "Novogradski dani 2024", koja je počela 30. maja trajala je mjesec. Raznovrsni programski sadržaji namijenjeni svim uzrastima, od najmlađih do građana treće životne dobi, privukli su veliki broj posjetilaca, posebno omladine s područja općine Novi Grad, ali i iz drugih općina Kantona Sarajevo, a u njima je uživalo više od 30.000 građana.

Održano je 20 kulturno-umjetničkih i zabavnih događaja, publika je uživala u koncertima zabavne i narodne muzike, večerima sevdaha i duhovne muzike, modernom plesu, poetskim susretima, izložbama, festivalima folkloru i pozorišnim predstavama, druženjima, zabavama za djecu, omladinu i starije, te brojnim kulturnim i sportskim sadržajima.

Koncert zabavne muzike održan je ispred sportske dvorane Dobrinja, a nastupila je Džejla Ramović. Četvrti dan Bajrama upriličen je koncert duhovne muzike, sa novogradskim horovima "Šapat srca"

i hor "Hamza", kao i koncert sevdaha na kojem je nastupila grupa "Divanhana" u Centru „Safet Zajko“ pred sami završetak manifestacije „Novogradski dani 2024“. Upriličene su dvije izložbe, dvije pozorišne predstave za djecu i odrasle, druženje sa novogradskim osnovnim školama. Za građane treće životne dobi upriličeno je zajedničko druženje, kompletne porodice imale su priliku uživati u porodičnom danu, dok je za maturante priređen defile i zabava uz muzički program. Od sportskih aktivnosti održani su međunarodni i omladinski turniri u odbojci, karateu, malom nogometu, košarci, rukometu, boksu, šahu, kao i državno prvenstvo u stonom tenisu. U sklopu sportskog dijela manifestacije po prvi put je održano konjičko takmičenje "Prvenstvo grada Sarajeva i Kup BiH", izložba elektronskih vozila, kao i teniski turnir sa kojima su završeni Novogradski dani.

Jedan od najznačajnijih događaja u sklopu "Novogradskih dana" je otkrivanje spomenika "Krila slobode" na Golom Brdu, 8. juna, na Dan odbrane općine Novi Grad Sarajevo i bitke za brdo Žuč.

Na manifestaciji otkrivanja spomenika "Krila slobode" prisustvovalo je više od šest hiljada posjetilaca.



1. 6. 2024.

SPORT

Konjičko takmičenje u dresurnom jahanju

U okviru manifestacije “Novogradski dani 2024”, prvi put je organizovano takmičenje u dresurnom jahanju, a Konjički klub “Pegasos” bio je domaćin Prvenstva Grada Sarajeva 2024. i 1. kola KUP-a Bosne i Hercegovine u dresurnom jahanju.

Jahanje je poseban sport, jer je jedina olimpijska disciplina u kojoj se muškarci i žene takmiče u istoj kategoriji, što ga čini izuzetno zanimljivim.

Dresurno jahanje je olimpijska disciplina koja zahtijeva visoki nivo preciznosti, kontrole i harmonije između konja i jahača. Takmičari su izvodili unaprijed određene figure u areni, prikazujući sklad, fleksibilnost i poslušnost konja. Sudije su ocjenjivale performanse na osnovu tačnosti izvedbe, elegancije i međusobne komunikacije jahača i konja.

Rezultati takmičenja su sljedeći:

- Pobjednica u kategoriji “mladi konj 6 godina” bila je Sara Čehajić iz Konjičkog kluba Visoko.
- Prvoplasirana u kategoriji “Mladi konj 7 godina” bile su Emina Halilbašić i Hadidža Hodžić iz Konjičkog kluba “Fenix”.
- Pobjednica u kategoriji djeca i pobjednica Prvenstva Grada Sarajeva bila je Luna Jusufović, članica Konjičkog kluba “Sarajevo”.

- Pobjednica u kategoriji juniora bila je Ena Herenda iz Konjičkog kluba “Pegasos”.

- Pobjednica kategorije seniora i drugoplasirana na Prvenstvu Grada Sarajeva bila je Ejna Malagić iz Konjičkog kluba “Pegasos”.

- Pobjednica kategorije paradresure bila je Esmā Zaimović iz Konjičkog kluba “Pegasos”.

- Pobjednik utakmice X-1 bio je Isa Muratović iz konjičkog kluba “Pegasos”.

- Pobjednik utakmice E-1, kao i utakmice A-1, bio je Ali Čehajić iz Konjičkog kluba “Visoko”.

Najmlađi učesnik bio je Eren Muratović sa samo šest godina iz konjičkog kluba “Pegasos”.

Ovom prilikom predstavnici Konjičkog kluba “Pegasos” dodijelili su načelniku Semiru Efendiću zahvalnicu za podršku i doprinos unapređenju sportskih jahačkih aktivnosti mladih kroz učešće u organizaciji prvog Prvenstva Grada Sarajeva u dresurnom jahanju 2024.



1-2.6.2024.

SPORT

Sajam električnih automobila na Dobrinji

Auto 4x4 Club organizovao je 5. moveEco – Sajam električnih vozila u okviru manifestacije “Novogradski dani 2024”. Sajam je održan na Bulevaru branilaca Dobrinje. Bila je to prilika da se promoviraju vozila ekološki prihvatljivog transporta sa ciljem očuvanja životne sredine. Posjetitelji sajma imali su priliku vidjeti nova vozila, oldtimere i sportske automobile, a izložba se realizuje u sklopu akcije “Sigurnost na cestama u Bosni i Hercegovini”.

Za najmlađe posjetioce napravljen je poseban poligon, gdje su pored vožnje vozila za njihov uzrast, dobili i bojanke pomoću kojih će sticati nova znanja vezana za sigurnost u saobraćaju.

Izložena su bila električna vozila, dvadeset romobila, trotineta, bicikli i skuteri na struju, kao i punjači za električna vozila.

Poseban program priređen je za djecu, karting gdje su se djeca mogla slikati, ali ne i voziti. Za njih su pripremljeni posebni autići koje su mogli voziti, a dobili su i specijalne brošure –bojanke, gdje kroz bojenje uče o sigurnosti u saobraćaju. Dio sajamskog programa bila je i policija MUP-a Kantona Sarajevo sa vozilom presretačem, kako bi pokazali rad policije u lokalnoj zajednici.



1 - 2. 6. 2024.

SPORT

OKI "Fantomi" pobjednici 23. Sarajevo Open turnira

Odbojkaški klub invalida "Fantomi" pobjednik je 23. međunarodnog turnira u sjedećoj odbojci "Sarajevo Open 2024", koji se igrao u sportskoj dvorani "Ramiz Salčin" na Mojmilu 01. i 02. juna 2024. godine.

Međunarodni turnir u sjedećoj odbojci "Sarajevo Open 2024" održan je u okviru manifestacije "Novogradski dani 2024", a titula najboljih i ovaj put pripala je OKI "Fantomima" koji su u finalnoj utakmici pobijedili Bayer Leverkusen 04 rezultatom 3:0 (25:20; 25:23 i 26:24). Treće mjesto osvojila je ekipa SKISO "Sinovi Bosne" Lukavac.

Direktor OKI "Fantomi" Mirsad Mirojević, izrazio je zadovoljstvo zbog velike posjećenosti turniru istakavši da je ovo još jedna titula prvaka u nizu koju su OKI "Fantomi" osvojili ove godine.

Na turniru je nastupilo osam ekipa i to, Bayer Leverkusen 04, iz Njemačke, Hrabri, Zagreb i HVIDR-a Osijek iz Hrvatske, te bh. timovi Borac iz Banje Luke, 'Jedinstvo Brčko-Boće', Sinovi Bosne iz Lukavca i OKI Fantomi iz Sarajeva.



1-2.6.2024.

SPORT

Državno prvenstvo u praktičnom streljaštvu

U okviru 26. manifestacije "Novogradski dani 2024" na sportskom strelištu na Žuči održano je državno prvenstvo BiH u IPSC-u, koje je organizovao KPS CARACAL.

Ostvareni su sljedeći rezultati:

Divizija PCC OPTICS

1. Mustafa Bukva (bullet)
2. Edin Čano (caracal)
3. Amin Mehinović(9mm)

Ekipno Produkcija

1. Bullet
2. TargeTz
3. POINT

Divizija PRODUKCIJA

1. Amar Agrtović (bullet)
2. Dean Prodanović (targeTz)
3. Darko Bugarin (POINT)

Divizija PRODUCTION OPTICS

1. Muhamed Hadzović (bullet)
2. Teo Žigić (POINT)
3. Edin Čano (caracal)

Produkcija Junior

1. Nedin Hozdić (Alfa code)
2. Hamza Vejo (caracal)
3. Tarik Brkić (caracal)

Ekipno Produkcija OPTICS

1. Bullet
2. POINT
3. Caracal

Produkcija Lady

1. Jesenka Rešidović (bullet)
2. Emina Cerić-Sadiković (bullet)
3. Adis Smajlović (bullet)

Divizija STANDARD

1. Ammar Jažić (POINT)
2. Boris Časar (caracal)
3. Adi Alić (bullet)

Produkcija Seniori

1. Elvir Džuho (targeTz)
2. Saša Smajlović (bullet)
3. Saudin Isaković (shot)

Ekipno Standard

1. Caracal Bigeste
2. Bullet
3. Alfa Code-Point



1-2.6.2024.

SPORT

OK "Novi Grad" prvaci 12. međunarodnog odbojkaškog turnira prijateljstva i mladosti

Finale 12. međunarodnog turnira prijateljstva i mladosti, održanog u okviru manifestacije "Novogradski dani 2024", donijelo je još jednu titulu prvaka za OK "Novi Grad". Odbojkašice kluba "Novi Grad" slavile su pobjedu u finalnoj utakmici u kojoj su pobijedile ZOK "Domžale" iz Slovenije.

Na turniru je učestvovalo 300 učesnika, iz pet država iz Austrije, Slovenije, Hrvatske, Srbije i Bosne i Hercegovine, takmičili su se u tri kategorije, predpionirskoj, pionirskoj i kadetsko – juniorskoj.

U predpionirskoj kategoriji pobjednice su bile odbojkašice iz OK "Pazin", iz Hrvatske, drugo mjesto pripalo je OK "Umag", također iz Hrvatske, a treće mjesto OK "Ljubljana" iz Slovenije.

Pobjeda u kategoriji pionira pripala je djevojkama iz OK "Pazin", drugo mjesto osvojio je OK "Ljubljana", a treće mjesto OK "Novi Grad".

U kadetsko – juniorskoj kategoriji prvo mjesto zauzele su odbojkašice iz OK "Novi Grad", koje su u finalnoj utakmici pobijedile ZOK "Domžale", a treće mjesto zauzele su odbojkašice iz OK "Pazin".

Podrška pri organizaciji 12. međunarodnog turnira mladosti i prijateljstva je još jedan način na koji Općina Novi Grad pruža podršku u razvoju sporta i mladih talenata Novog Grada. Međunarodni odbojkaški turnir prijateljstva i mladosti postao je lijepa tradicija druženja i takmičenja sa ekipama iz drugih država, čime se jačaju veze i prijateljstva među mladima.



26. TRADICIONALNA MANIFESTACIJA
NOVOGRADSKI DANI 2024
od 29. maja do 30. juna




Konjičko takmičenje
Prvenstvo Grada Sarajeva i KUP BiH

**1. 6. 2024.
od 10 sati**

Konjičko rekreativni centar
„Pegasos“ Ahatovići

26. TRADICIONALNA MANIFESTACIJA
NOVOGRADSKI DANI 2024
od 29. maja do 30. juna




8.
ATLETSKI MITING

**2. 6. 2024.
od 17 sati**

ATLETA



Centar za edukaciju,
sport i rekreaciju
„Safet Zajko“

26. TRADICIONALNA MANIFESTACIJA
NOVOGRADSKI DANI 2024
od 29. maja do 30. juna




CARACAL
PRACTICAL SHOOTING CLUB



BH IPSC

DRŽAVNO PRVENSTVO
U PRAKTIČNOM STRELJASTVU

01/02.06.2024.

26. TRADICIONALNA MANIFESTACIJA
NOVOGRADSKI DANI 2024
od 29. maja do 30. juna




TENISKI TURNIR
Novogradski dani 2024

**29.06. -30.06.
od 9:30 sati**




Centar za edukaciju,
sport i rekreaciju
„Safet Zajko“

2. 6. 2024.

SPORT

9. atletski miting okupio blizu stotinu takmičara iz BiH, Srbije i Crne Gore



U prekrasnoj atmosferi i uz izvanredne rezultate, u Centru "Safet Zajko" 02. juna 2024. godine, održan je 9. atletski miting Novi Grad Sarajevo, gdje su se atletičari takmičili u raznim disciplinama i postizali sjajne rezultate.

Na mitingu je učestvovalo 98 takmičara iz Bosne i Hercegovine, Srbije i Crne Gore, čime je ova manifestacija još jednom potvrdila svoj regionalni značaj. Najvredniji rezultati ovogodišnjeg mitinga postigli su:

Asmir Kolašinac iz OAK Beograd, Beograd sa rezultatom od 20,27 metara.

Nermin Štitkovic iz AK Sarajevo, Sarajevo sa rezultatom od 19,35 metara.

Farzaneh Fasihi iz OAK Beograd, Beograd.

Izvanredan uspjeh postigla je Maša Garić iz AK Novi Grad Sarajevo, koja je na mitingu oborila državni juniorski rekord na 100 metara s preponama sa vremenom od 13,95 sekundi. Ovaj rezultat je ujedno i norma za Svjetsko juniorsko prvenstvo koje će se održati u Limi, u Peruu.

Pored toga, Zerina Bešlija iz AK Vogošća ostvarila je normu za U18 Evropsko prvenstvo u Banskoj Bistrici ove godine, bacivši kuglu 14,61 metar.

Elmir Čerimagić, organizator mitinga, izjavio je da je Atletski miting postao prepoznatljiv u BiH i region, te da se samim tim povećava popularnost atletike što je primarni cilj Atletskog kluba Novi Grad.



3. 6. 2024.

SPORT

Street basket u Centru „Safet Zajko“

U Centru za edukaciju, sport i rekreaciju „Safet Zajko“ održan je turnir 3×3 za djecu uzrasta od pet do šesnaest godina u sklopu programa „Novogradski dani 2024“, a u organizaciji KK „Realway“. Na ovom uzbudljivom turniru su se takmičile ekipe iz cijelog Kantona Sarajevo podijeljene u tri kategorije mini, midi i maxi kategorije, a na turniru je učestvovalo 130 dječaka i djevojčica. U mini kategoriji su učestvovala djeca rođena 2014. godine i mlađi.

Prve tri pozicije u ovoj kategoriji osvojile su ekipe: Prinčipeze, Cigle i Magi. U midi kategoriji su učestvovala djeca rođena 2011., 2012. i 2013. godine a prijavilo se 10 ekipa. Prva tri mjesta pripala su sljedećim ekipama: Aligatori, Zlatne ribice, Spartanci i Zmajevi su dijelili treće mjesto. U maxi kategoriji učestvovala su djeca rođena 2010. godine i starija.

Prve tri pozicije u maxi kategoriji osvojile su ekipe: Sokolje, Jazavci i Pitagore.



3. 6. 2024.

KULTURA

Izložba iz slikarskog fundusa Bošnjačkog instituta “Izazov formata”

U Galeriji Općine Novi Grad Sarajevo, 3. juna 2024. godine, otvorena je izložba „Izazov formata“ iz slikarskog fundusa Bošnjačkog instituta. Izložba je rezultat dugogodišnje saradnje između Općine Novi Grad i Bošnjačkog instituta – Fondacija Fadila Zulfikarpašića, a bila je dio programa tradicionalne manifestacije „Novogradski dani 2024“.

Postavku su činili radovi iz Zbirke umjetničkih djela Bošnjačkog instituta, sa zastupljenim bosanskohercegovačkim autorima poput Affana Ramića, Seida Hasanefendića, Mersada Berbera, Salima Obralića, Ismara Mujezinovića, Izeta Alečkovića, Jusufa Suljanovića i drugih istaknutih slikara 20. i početka 21. stoljeća koji su se unutar svojih opusa, okušali i u slikarskim ostvarenjima neobičnih formata: velikih ili malih dimenzija, polukružnih, kružnih i drugih neuobičajnih nosilaca radova.

Kroz izložena umjetnička ostvarenja, posjetioci su imali priliku da steknu uvid u sam proces umjetničkog stvaralaštva nekih od naših najznačajnijih autora.

Predstavljena su djela različitih formata kao što i sam naziv izložbe govori, u različitim tehnikama, različitim oblika, dimenzija i struktura.



5. 6. 2024.

Defile maturanata novogradskih osnovnih škola, mladost i ljepota na ulicama Novog Grada





Više od 1.100 maturanata novogradskih osnovnih škola okupilo se 06. juna 2024. godine ispred zgrade Općine Novi Grad, odakle je krenuo svečani defile prema Centru „Safet Zajko“ gdje je DJ upriličio zabavu za maturante.

Tradicionalni defile maturanata bio je prilika da se proslavi završetak osnovne škole i obilježi početak novih životnih avantura za učenike osnovnih škola iz Novog Grada. Uzbuđenje i radost bili su vidljivi na njihovim licima dok su koračali ulicama Novog Grada ostavljajući iza sebe tragove školskih dana. Djevojke i mladići plesali su i pjevali, te se zabavljali uz zvuke elektronske muzike koju je za njih pripremio mladi bosanskohercegovači DJ Amar.

Maturantima se pridružio i načelnik Općine Novi Grad Sarajevo Semir Efendić i čestitao im na uspješno završenom poglavlju osnovnog obrazovanja, te im poželio sreću u budućnosti uz nadu da će ispuniti svoje ciljeve i snove.

6. 6. 2024.

KULTURA

Šest stotina novogradskih mališana uživalo u predstavi „Zmaj i nogometaševa kći“

Na sceni multimedijalne sale Općine Novi Grad 6. juna 2024. godine, izvedena je zanimljiva i uzbudljiva predstava za djecu, „Zmaj i nogometaševa kći“.

Glumačku ekipu činili su Armin Omerović u ulozi zmaja, Ana-Marija Tomić kao nogometaševa kći i Senad Bostandžić kao gradonačelnik. „Zmaj i nogometaševa kći“ je lepršava predstava, u kojoj se kroz igru stapaju mašta i stvarnost, u kojoj i planeta Zemlja postaje razigrana i raspjevana lopta. Zmajevi su stoljećima dio dječijih priča i često se doživljavaju kao magična stvorenja koja djecu mogu odvesti u nevjerojatne avanture. Bilo da su prijateljski raspoloženi ili zastrašujući, zmajevi stvaraju sjajne priče djeca će uvijek biti fascinirana ovim magičnim stvorenjima.

Predstavu je pogledalo oko 600 učenika novogradskih osnovnih škola OŠ „Fatima Gunić“, „Avdo Smailović“, „Mehmedalija Mak Dizdar“, „Umihana Čuvidina“, te mališani iz vrtića „Mala raja“ koji su uz aplauze i smijeh rješavali zagonetke sa zmajem.



9. 6. 2024.

SPORT

Ekipa Lokoma pobjednica malonogometnog turnira “Herojima naselja heroja”



Povodom obilježavanja dana kada je naselje Sokolje 1993. godine odlukom Skupštine Grada Sarajeva, dobilo službeni naziv Naselje heroja Sokolje, 09. juna. 2024. godine, Udruženje “Naši heroji” organizovalo je malonogometni turnir veterana i obilježavanje ovog značajnog, ali često zaboravljenog datuma, pod nazivom “Herojima naselja heroja”.

U okviru manifestacije “Novogradski dani 2024”, turnir je bio prilika da se oda počast herojima ovog naselja za njihovu hrabrost i žrtvu. Na turniru je učestvovalo osam ekipa, a najbolja je bila ekipa Lokom d.o.o., koja je u finalnom susretu pobijedila MNK “Crni labud”

rezultatom 8:0. Treće mjesto osvojila je ekipa Udruženje “Naši heroji” koji su nakon izvođenja jedanaesteraca pobijedili ekipu 2. viteške brigade.

Najbolji igrač turnira bio je Adis Šahmanija, a najbolji strijelac Kerim Kadrić, obojica iz pobjedničke ekipe “Lokom” d.o.o. Titulu najboljeg golmana ponio je Senad Salhić iz trećeplasirane ekipe Udruženja “Naši heroji”.

Turnir “Herojima naselja heroja” bio je prilika za sportsko takmičenje, ali i za prisjećanje na heroje koji su se borili za slobodu ovog herojskog naselja.



10. 6. 2024.

KULTURA

Večer modernog plesa uz mnoštvo raznovrsnih plesnih stilova

U Centru za edukaciju, sport i rekreaciju „Safet Zajko“ 10. juna 2024. godine, održana je večer modernog plesa pod nazivom „Ples pod zvijezdama“, kao dio 26. tradicionalne manifestacije „Novogradski dani 2024“. Manifestacija je okupila veliki broj ljubitelja plesa, roditelja i mališana koji su uživali u bogatom programu ispunjenom različitim plesnim stilovima i ritmovima, uključujući latino muziku, hip-hop, sambu, street dance, break dance i mnoge druge. Nastupilo oko 120 članova plesnog kluba „Astorija“, najtrofejnijeg plesnog kluba u Bosni i Hercegovini.



11. 6. 2024.

DAN NOVOGRADSKIH OSNOVNIH ŠKOLA I KVIZ ZNANJA

KULTURA



Učenici OŠ “Sokolje” pobjednici ovogodišnjeg kviza “Sveznalica”

Učenici OŠ “Sokolje” pobjednici su ovogodišnjeg kviza “Sveznalica” koji je održan u Centru za edukaciju sport i rekreaciju „Safet Zajko“, a gdje je održan Dan novogradskih osnovnih škola, kao dio programa tradicionalne 26. manifestacije „Novogradski dani 2024“.

U pobjedničkoj ekipi bili su Oglečevac Meldin, Bosno Sarah, Užičanin Adman sa nastavnikom Crnčević Eldinom.

Drugo mjesto osvojili su učenici iz OŠ “Fatima Gunić”, koju su predstavljali Hadžić Zlatan, Jetulahović Farah i Džajić Lamija sa nastavnicom Melihom Agić, dok je treće mjesto pripalo OŠ “Mehmedalija Mak Dizdar” koju su predstavljali učenici Šonja Tajra, Čenanović Taril, Kadrić Merjem i nastavnica Rašela Novalić. Četvrti su bili učenici OŠ “Čamil Sijarić”, Ali Selimović, Račić Amina, Osmić Amina i nastavnica Kulašin Enisa.

Kao i svake godine, učenici i nastavnici novogradskih osnovnih škola pripremili su bogat kulturni, edukativni i zabavni sadržaj na kojem su u prethodnom periodu predano radili.

Manifestacija je započela uz uzbudljivi kviz “Sveznalica”, autorsko djelo profesora Vedrana Zubića, osmišljeno s ciljem dodatne edukacije učenika osnovnih škola na zabavan način, posebno u

oblasti geografije Bosne i Hercegovine.

U kvizu je učestvovalo trinaest novogradskih osnovnih škola, čiji su učenici pokazali izuzetno znanje iz različitih oblasti poput, sporta, historije, geografije, muzičke i likovne umjetnosti, te općeg znanja.

U ocjenjivačkom timu bili su profesori Admir Kustura, Mediha Brodović i Subhija Kamenica.

Učenici se predstavili igrama, plesom, pjesmom...

U kulturno-umjetničkom dijelu manifestacije, predstavilo se 11 osnovnih škola iz Novog Grada koje Općina podržava kroz projekat podrške vannastavnim aktivnostima učenika novogradskih škola. Zabava, ples i smijeh bila je upriličena za djecu, roditelje i posjetioce koji su odlučili večer provesti uz učenike novogradskih škola i uživati u njihovim izvedbama. Pored brojnih različitih tačaka, svi posjetioći su imali priliku vidjeti i kreativne radove učenika, koje su uz mnogo uložnog truda uradili na časovima sa svojim nastavnicima, te ih predstavili ovom prilikom.

Prezentovani su kreativni učenički radovi iz područja tehničke kulture, likovne kulture, robotike i ostalih kreativnih radionica i sekcija.



13. 6. 2024.

KULTURA

Druženje za novogradske penzionere uz pjesmu, muziku i bosansko kolo

U Centru "Safet Zajko" upriličeno je tradicionalno druženje za novogradske penzionere, u organizaciji Općine Novi Grad. Više od 600 penzionera iz Novog Grada okupilo se, uživajući u suncu, lijepom vremenu, sevdalinci i bosanskom kolu.

Svake godine, u okviru manifestacije "Novogradski dani", Općina Novi Grad organizuje druženje za novogradske penzionere, koji osobama treće životne dobi mnogo znači, jer to nije samo prilika za zabavu, već i za okupljanje, razgovor i uživanje u društvu prijatelja i poznanika. Prisutne je pozdravila predstavnica Općine Novi Grad Naliha Šabanović i poželjela im dobru zabavu uz bogat program koji je Općina pripremila za njih.

Predsjednik Udruženja penzionera Novi Grad Ahmed Bešić, zahvalio je Općini Novi Grad na pažnji koju im pruža i istakao da su sretni jer žive upravo u ovoj lokalnoj zajednici.

Za poseban ugođaj pobrinulo se Udruženje ljubitelja sevdaha „Sevdalinka“.

Na pozornici su nastupili Zulfo Bota sa pjesmama "Razbolje se

srce moje" i "Omer beže", Miralem Gluhović sa pjesmama "Vihor ružu niz polje tjeraše" i "Duhni vjete", Edo Jahić sa pjesmama "Oj jeseni tugo moja" i "Djevojčice, djevojčice mala", Amir Musa sa pjesmama "Ja zagrizoh šareniku jabuku" i "Pjevala je Šemsa mala", Mesud Kreštalica sa pjesmama "Sabah zora živom bojom" i "Ne ljubi ciganku", Zulfija Tahirović sa pjesmama "Rasla je ruža" i "San zaspala", Mirsada Čatić Mekić sa pjesmama "Siroče sam na sve mi se žaluje" i "Na teferić pošla nana", Ifeta Doglud sa pjesmama "Moj dilbere" i "Sejdefu majka buđaše", Aldijana Dizdarević sa pjesmama "Kaharli sam" i "Zvijezda tjera mjeseca".

Posebni gosti su bili Hamza Šantić sa pjesmama "Šeher grade Banja Luko mila" i "Vino pije Selman-aga", te Hamid Ragipović Besko sa pjesmama "Srdo moja" i "Mlado momče za Sjenicu pita".

Orkestrom je rukovodio Jasmin Ferhatbegović, šef orkestra, dok je program vodio Enver Šadinlija, koji je kroz kratka predstavljanja upoznao prisutne sa učesnicima.



14. 6. 2024.

KULTURA

Promocija odabranih priča Ćamila Sijarića

U Centru za kulturu i edukaciju "Safet Zajko" upriličena je promocija knjige „Ram Bulja i druge pripovijetke“ autora Faruka Dizdarevića. Prošle, 2023. godine, u organizaciji Akademije nauka i umjetnosti BiH, Društva pisaca BiH, Univerziteta u Sarajevu i Udruženja građana porijeklom iz Sandžaka sa sjedištem u Sarajevu, održano je sjećanje na Ćamila Sijarića (1913-1989.), a u povodu stotinudeset godina od književnikova rođenja. Tim povodom štampana je knjiga odabranih priča Ćamila Sijarića „Ram Bulja i druge pripovijetke“, koju je priredio akademik Faruk Dizdarević, a izdalo Udruženje građana porijeklom iz Sandžaka u BiH. Predgovor u knjizi napisao je predsjednik Društva pisaca BiH književnik Hadžem Hajdarević. Na promociji knjige govorili su: prof. dr. Nadija Rebronja, Muharem Hamzić i akademik Faruk Dizdarević, autor knjige.



14. 6. 2024.

KULTURA

Koncert narodne muzike i sevdaha

Na sportskom terenu ispred dvorane "Srce" u naselju Buča Potok održan je koncert narodne muzike i sevdaha u izvedbi orkestra Harisa Kaltaka. Novogradska publika je imala priliku uživati u muzičkim hitovima narodne muzike i sevdaha koje su izvodili pjevači Hajrudin Hazre Udvinčić, Amir Begović i Adnan Kuka.



14 - 16. 6. 2024.

SPORT

FK „Željezničar“ pobjednik 13. međunarodnog turnira „Igraj fudbal, živi život“

Trinaesti međunarodni turnir pod nazivom „Igraj fudbal, živi život“ održan je u Centru za edukaciju, sport i rekreaciju „Safet Zajko“. Prva utakmica odigrana je u petak, 14. juna 2024., a turnir je okončan u nedjelju 17. juna.

U finalnoj utakmici između FK Željezničar i FK Budućnost iz Podgorice, ekipa Željezničara je slavila pobjedu rezultatom 4:1, osiguravši vrh na ovom prestižnom takmičenju.

Pogotke za pobjedničku ekipu FK Željezničar postigli su Omerbašić, Gavrilović, Sahačić i Grujić, a jedini pogodak za tim iz Podgorice postigao je Anđelčić.

U utakmici za treće mjesto, NK „Lokomotiva“ iz Zagreba je savladala FK „Sarajevo“ rezultatom 2:0, a pogotke za „Lokomotivu“ postigli su Serdo i Šaronja.

Za najboljeg igrača turnira proglašen je Vedad Sijerčić, član pobjedničke ekipe Željezničara. Prvi strijelac turnira bio je Luka Gavrilović, također iz FK Željezničar sa postignuta tri pogotka, dok je za najboljeg golmana turnira proglašen Maksim Podliesnyi iz FK Lokomotiva.

Organizator ovog događaja bilo je Udruženje za podsticaj kulture i sporta Profesional iz Sarajeva, a turnir je održan u okviru tradicionalne 26. manifestacije „Novogradski dani 2024“. Pravo učešća na turniru imali su igrači do 16 godina.

Nagrade i pehare uručili su ispred Udruženja za podsticaj kulture i sporta Profesional iz Sarajeva Dejan i Davor Radović, a ispred Organizacionog odbora manifestacije „Novogradski dani 2024“ pehare je uručio Haris Mušinić.



14. 6. 2024.

KULTURA

Muzička večer DJ-a

U okviru manifestacije “Novogradski dani 2024” Udruženje za umjetničko stvaralaštvo i kreativni razvoj je realiziralo muzički program uz nastup DJ-a na Bulevaru branilaca Dobrinje. Ovom prilikom pripremljen je muzički program s ciljem promocije umjetnosti, kreativnosti i kulturne raznolikosti kroz elektronsku muziku uz kombinovanje tradicionalnog, etno i modernog zvuka.

15. 6. 2024.

SPORT

U dvorani OŠ “Behaudin Selmanović” održan 9. tradicionalni rukometni turnir

Tradicionalni turnir u rukometu u organizaciji RK “Briješće” održan je u sportskoj dvorani škole “Behaudin Selmanović”. Turnir je okupio 110 učesnika, a među ekipama su bile RK “Kakanj”, RK “Radnički Goražde”, RK “Velež Mostar”, ŽRK “Goražde 1979”, te domaće ekipe djevojčica i dječaka iz RK “Briješće”.

Pobjedu na ovogodišnjem turniru odnijeli su dječaci iz RK “Briješće”, drugo mjesto pripalo je ekipi RK “Kakanj”, dok je treće mjesto osvojila ekipa RK “Radnički Goražde”, a četvrto mjesto bili su dječaci iz RK “Velež Mostar”.

Almir Podrug sekretar RK “Briješće” i član organizacionog odbora

rukometnog turnira rekao je da je Briješće naselje rukometa i da se nada da će se njihovi uspjesi nastaviti i u budućnosti.

U revijalnoj utakmici su se sastale djevojčice iz Goražda i Briješća, pruživši publici dodatno rukometno uzbuđenje.

Posebna priznanja dodijeljena su sljedećim igračima:

Vedad Šahinović (Radnički) – najbolji igrač turnira

Bakir Podrug (RK Briješće) – najbolji strijelac turnira

Cakaj Nedim (RK Briješće) – najbolji golman turnira

Na kraju turnira, podijeljeni su pehari i zahvalnice, čime je ovaj sportski događaj svečano završen.



19. 6. 2024.

KULTURA

Općina Novi Grad Sarajevo u okviru manifestacije „Novogradski dani 2024“ i ove godine je organizovala koncert duhovne muzike na kojem su nastupili novogradski horovi „Šapat srca“ i „Hamza“.

Koncert je održan u prelijepom ambijentu Centra „Safet Zajko“, gdje je uz ilahije i kasida obilježen četvrti dan Kurban-bajrama. Nekoliko stotina građana istinski je uživalo u ugodnoj junskoj večeri uz posebno odabrane intepretacije.

Koncert su otvorile djevojke iz hora „Šapat srca“ sa učenjem salavata, nakon čega su izvele ilahije „Muhammed je kruna neba“, „Ej Allahu“, „Kruno svega stvorenoga“, „Ya Mustafa“, „Bejtulahov crn ogrtač“, „Ben yurum“, „Pogledaj nas“, „Tesnimsko vrelo“ i „Tebe trebam“.

Nakon nastupa djevojaka novogradskog hora, koje su svojim umilnim glasovima razgalile duše i srca svih prisutnih, publiku su svojim izvedbama počastili i članovi hora „Hamza“.

Hor „Hamza“ je jedan od najistaknutijih bosanskohercegovačkih

izvođača duhovne muzike, a večeras su za novogradsku publiku izveli neke od najljepših ilahija i kasida.

Svoj nastup započeli su interpretacijom numere s novog albuma pod nazivom „Iskreno“, koji je promovisan u multimedijalnoj sali Općine Novi Grad 28. februara 2024. godine.

Potom je uslijedila i izvedba „Kraljica“, pjesma koja govori o tome da je smrt sastavni dio života, ali i to da je jako bitno svakodnevno iskazivati ljubav prema osobama koje volimo. Naš je samo ovaj trenutak kojeg upravo živimo, i s toga ga ispunimo ljubavlju, poruka je ove interpretacije.

Izvedene su i ilahije „Jutarnji vjetre“, te „Samo Allah istina je“, „Za nju vrijedi umrijeti“, „Ramazan“, a koncert je završen učenjem salavata.

Tokom dvosatnog koncerta mnogobrojna publika je istinski uživala u izvedbama najljepših ilahija i kasida, a izvođači su nagrađeni gromoglasnim aplauzima.




Na koncertu duhovne muzike mnogobrojna publika uživala u izvedbama novogradskih horova



20. 6. 2024.

Džejlja Ramović na Dobrinji održala spektakularan koncert pred više od 6.000 ljudi





Na platou ispred sportske dvorane Dobrinja održan je prvi solistički koncert Džejele Ramović, u organizaciji Općine Novi Grad, u okviru 26. tradicionalne manifestacije "Novogradski dani 2024".

Oko 6.000 ljudi uživalo je u nezaboravnom muzičkom spektaklu, uz bezvremenske hitove kao što su "Jel' Sarajevo gdje je nekad bilo", "Ja za ljubav neću moliti", "Lipe cvatu" i mnoge druge, a koncert je počeo Džejinim prvijencem pjesmom "Ruine".

Dobrinja je bila ispunjena pjesmom, plesom i lijepim raspoloženjem. Sve generacije su uživale u koncertu, od mališana do najstarijih sugrađana. Publika je sa Džejlom pjevala najveće regionalne hitove, stvarajući nezaboravnu atmosferu za sve prisutne.

Džejla je pozdravila publiku na Dobrinji i poručila da je sretna što je njen prvi koncert pred sarajevskom publikom upravo u Novom Gradu. "Bila sam sretna kad sam dobila poziv od Općine Novi Grad i zaista prvi put imam veliku tremu" izjavila je Džejla.

Publika je uživala do kasno u noć, a tokom cijelog događaja vladala je izuzetno pozitivna atmosfera. Koncert je završen izvedbom jedne od najpopularnijih pjesama Dine Merlina "Sve je laž".

Na kraju se zahvalila publici i organizatoru koncerta, izrazivši nadu da neće dugo čekati na ponovni susret sa novogradskom publikom.

20. 6. 2024.

KULTURA

DAN OTVORENIH VRATA CENTRA ZA KULTURU I EDUKACIJU „SAFET ZAJKO“

Više od 300 polaznika besplatnih radionica predstavilo svoj rad

U Centru za kulturu i edukaciju "Safet Zajko" u srijedu, 12. juna 2024. godine organizirani su Dani otvorenih vrata Centra. Za sve polaznike Centra održana je priredba na kojoj su polaznici radionica imali priliku predstaviti svoj rad u proteklom periodu. Više od 300 mališana predstavilo se kroz različite programske aktivnosti. Roditelji, prijatelji i poznanici, kao i svi prisutni posjetioци imali su priliku uživati u muzičkom i zabavnom programu. U sklopu programa održan je koncert polaznika violine, klavira i gitare, a Dan otvorenih vrata Centra otvoren je izložbom radova polaznika likovne radionice. Djeca su pokazala svoje znanje stečeno tokom ciklusa od četiri mjeseca rada. Oko hiljadu polaznika do sada je prošlo kroz Centar i pohađalo besplatne radionice, muzičke (klavir, violina i gitara), likovnu radionicu, mozgaonicu, dramsku i foto&video radionicu.





20 - 23. 6 . 2024.

SPORT

Internacionalni fudbalski turnir “Sarajevo Trophy by Sara”

Na stadionu Otoka, 20. juna 2024. godine, svečano je otvoren Internacionalni fudbalski turnir “Sarajevo Trophy by Sara”. Ovaj prestižni događaj, koji je dio manifestacije “Novogradski dani”, organizirala ga je Akademija fudbala Sparta, okupio je više od 60 klubova i oko 3.000 djece iz devet zemalja: Bosne i Hercegovine, Mađarske, Rumunije, Albanije, Sjeverne Makedonije, Slovenije, Hrvatske, Srbije i Crne Gore.

Ceremonija je započela defileom timova, tokom kojeg su mladi sportisti ponosno nosili svoje klupske zastave i predstavili se publici. Bosanskohercegovački interpretator Eldin Huseinbegović je svojim emotivnim izvođenjem pjesme “Sarajevo ljubavi moja” dodatno uljepšao večer, a zatim su uslijedila obraćanja istaknutih zvanica. Predsjednica Akademije fudbala Sparta, gospođa Afrodita Šukalo, izrazila je zadovoljstvo zbog velikog odziva i istaknula važnost ovog turnira za promociju sporta među mladima i promociju Sarajeva kao grada sporta i kulture.

Prisutnima se, između ostalih, obratio i načelnik Općine Novi Grad Semir Efendić i poželio dobrodošlicu svim prisutnim na stadionu

Otoka, koji dugo nije bio u ovakvoj atmosferi.

Prisutni su imali priliku pogledati snimljene videoporuke podrške našeg proslavljenog fudbalera Edina Džeke, grupe Helem Nejse i Frankieja. Događaj je dodatno obogatio nastup Plesnog centra “Just Dance”, koji je osvojio publiku svojom dinamičnom i energičnom plesnom tačkom.

Organizatori su se posebno prisjetili nedavno svirepo ubijenog Farisa Pendeka. U znak sjećanja, sportsku halu u naselju Otoka, u kojoj je svoje prve fudbalske korake Faris napravio proglasili su sportskom halom Faris Pendek. Ceremoniji otvaranja prisustvovali su porodica, rodbina i prijatelji Farisa Pendeka.

Na kraju, moderatori su pozvali sve ljubitelje fudbala da dođu i podrže mlade sportiste za vrijeme turnira, istaknuvši da je “Sarajevo Trophy by Sara” više od fudbalskog turnira – to je proslava sporta, kulture i zajedništva.

“Sarajevo Trophy by Sara” biće završen u nedjelju, a do tada se očekuje mnogo uzbudljivih utakmica i sportskih aktivnosti.





21-22. 6. 2024.

KULTURA

8. internacionalni festival folklora okupio 400 učesnika iz pet zemalja

Na otvorenoj sceni u Centru za edukaciju, sport i rekreaciju "Safet Zajko" održan je 8. internacionalni festival folklora, u okviru manifestacije "Novogradski dani 2024". Festival je ove godine okupio 400 učesnika iz Bosne i Hercegovine, Srbije, Crne Gore, Makedonije, Austrije i Brazila, a učesnici su kroz svoje izvedbe predstavili kulturu i tradiciju svojih domovina. Direktor internacionalnog festivala folklora Sahudin Kačar, pozdravio je publiku i poželio im dobrodošlicu istakavši da je cilj manifestacije očuvanje i promocija kulturne baštine, kao i jačanje veza među različitim zajednicama. Veliki broj ljubitelja folklora i tradicionalnih igara i plesova uživao je u izvanrednim izvedbama kulturno-umjetničkih društava iz cijeloga svijeta. Posebnu pažnju privukli su učesnici iz dalekog Brazila "Ansambel GAS Passo Fundo" koji su prvi put nastupili u Novom Gradu, donoseći dašak

egzotične kulture i energične ritmove. Publiku su nastupima počastili i KUD "Bulbul" iz Novog Grada koji su prvi nastupili, KUD "Kulin Ban" iz Austrije čiji su učesnici djeca iz Bosne i Hercegovine koja žive u Grazu (Austriji) i na ovaj način baštine i promovišu kulturu i tradiciju naše domovine. Nastupila su i kulturno-umjetnička društva iz susjedne Srbije, Folklorni ansambl Doma kulture iz Crne Gore, kao i KUD "Ljiljan" iz Makedonije, te KUD "Sebilj" iz Austrije, Beča, kao i novogradska kulturno-umjetnička društva BKD "Dobrinja 93", KUD "Saobraćajac" i "Gajret". BH. folk festival predstavlja izvanrednu priliku za međusobno upoznavanje kultura i tradicija, te promovisanje mira i prijateljstva među narodima.



Prijem za predstavnike BH folk festa i šefove ansambala, učesnika Internacionalnog festivala folklor

U zgradi Općine Novi Grad Sarajevo upriličen je prijem za delegaciju ovogodišnjeg Internacionalnog festivala folklor u kojoj su bili predstavnici inostranih ansambala sa po jednim parom u nacionalnoj nošnji.

Delegaciju iz Turske, Brazila, Makedonije, Srbije i Crne Gore, te Austrije, sa predstavnicima BH folk festa, predvođenu direktorom Sahudinom Kačarom, ugostili su pomoćnik načelnika Tajib Delalić, stručna savjetnica u Službi kabineta općinskog načelnika Amina Vatreš – Nezirević i stručna savjetnica za kulturu Naliha Šabanović. Uz riječi srdačne dobrodošlice, predstavnici Općine izrazili su zadovoljstvo njihovom posjetom ovoj lokalnoj zajednici, ali i bogatog programa kojim su se ove godine predstavili novogradskoj publici

tokom dvodnevnog Internacionalnog festivala folklor koji se održava u Centru "Safet Zajko" 21. i 22. 06.2024. godine.

Bila je to prilika da se predstavnici folklornih ansambala iz pet zemalja predstave i upoznaju sa domaćinima, te razmijene svoja iskustva u njegovanju kulture i tradicije zemalja iz kojih dolaze.

Prilikom susreta je istaknuto da Općina Novi Grad posebnu pažnju posvećuje očuvanju kulture i tradicije kroz organiziranje manifestacija kao što je 26. tradicionalna manifestacija "Novogradski dani", ali i drugih kulturnih sadržaja koji se održavaju tokom cijele godine u Centru za kulturu i edukaciju "Safet Zajko", kinu Novi Grad, galeriji Novi Grad i drugim lokacijama na području općine.

21 - 23. 6. 2024.

SPORT

Malonogometni memorijalni turnir “Safet Hadžić”, sjećanje na heroja odbrane BiH

Na sportskom igralištu u ulici Rasima Turkušića kod Eko-kuće na Mojmilu, održan je malonogometni memorijalni turnir “Safet Hadžić”, u organizaciji džemata Šehadet Mojnilo i Medžlisa Islamske zajednice Sarajevo, kao dio manifestacije “Novogradski dani”.

Turnir za dječake osnovnih škola održan je 21. juna, dok je turnir za odrasle održan 22. i 23. juna 2024. godine.

Turnir za dječake započeo je simboličnim udarcem lopte, kojeg je izveo unuk rahmetli Safeta Hadžića, Sulejman Gološ.

Na turniru je učestvovalo osam ekipa, Novi Grad-Plavi, Novi Grad-Crveni, FK Neradnički, MK, S.U. Sokolje, FK Šaja, Tulipani i FK Uvjerenje.

Prvo mjesto osvojila je ekipa Tulipani, drugo mjesto ekipa MK, treće mjesto ekipa FK Neradnički, a četvrto mjesto ekipa FK Šaja. Dino Đogić iz ekipe Tulipani proglašen je najboljim igračem turnira, dok je Amin Bašić iz ekipe MK proglašen najboljim golmanom.

Finalnoj utakmici i proglašenju pobjednika prisustvovao je načelnik Općine Novi Grad Sarajevo, Semir Efendić, koji je čestitao organizacionom odboru na uspješnoj organizaciji turnira. Imam džemata Šehadet, Ahmed ef. Spahić, uručio je zahvalnicu načelniku Efendiću za dugogodišnji doprinos džematu.

Na kraju turnura za dječake, načelnik Efendić, uz asistenciju Nezira Hadžića, sina rahmetli Safeta Hadžića, uručio je pehare, medalje, priznanja i novčane nagrade najuspješnijim ekipama i pojedincima. Turnir za odrasle otvoren je 22. juna, a Mustafa Planić, koji je bio s rahmetli Safetom Hadžićem u trenutku njegove pogibije, izveo je početni udarac.

Na turniru za odrasle učestvovalo je šesnaest ekipa, a najbolja je bila ekipa Ša Ma Stari Visoko, drugo mjesto osvojila je ekipa FK Rekreativo, treće mjesto ekipa Trabzonspor, a četvrto mjesto ekipa Sensu.

Dženan Klačar iz ekipe FK Rekreativo proglašen je najboljim igračem, a Salihović Kerim iz ekipe Ša Ma Stari Visoko najboljim golmanom turnira.

Imam džemata Šehadet Ahmed ef. Spahić uručio je Zahvalnicu direktoru JP Lokom d.o.o., Adnanu Šabanoviću, za veliki doprinos u organizaciji turnira posljednje tri godine.

Utakmici za treće mjesto i finalnoj utakmici te proglašenju pobjednika prisustvovao je nogometni reprezentativac Bosne i Hercegovine Haris Hajradinović, koji je uz asistenciju sina rahmetli Safeta Hadžića, Nezira Hadžića uručio pehare, medalje, priznanja i novčane nagrade najuspješnijim ekipama i pojedincima na turniru za odrasle.





26. TRADICIONALNA MANIFESTACIJA
**NOVOGRADSKI
DANI 2024**

od 30. maja do 30. juna



**OPĆINA NOVI GRAD
SARAJEVO**

21. 6. 2024.

KULTURA

„Osvrt“ - izložba umjetničkih djela autora Sadke Hadžihasanovića

U okviru manifestacije „Novogradski dani 2024“ u Galeriji Općine Novi Grad Sarajevo bila je postavljena izložba „Osvrt“, poznatog bosanskohercegovačkog umjetnika Sadke Hadžihasanovića. Izložba je realizovana u saradnji sa Umjetničkom galerijom BiH, koja je vlasnik izloženih djela.

Izložba „Osvrt“ predstavlja retrospektivu umjetničkog stvaralaštva Sadke Hadžihasanovića, obuhvatajući njegove radove nastale od 2000. godine do danas. Sadrži slike i nekoliko primjera asamblaža, sa naglaskom na tematske prikaze djece i ljudi s margine društva, kao što su slike djece sa oružjem, migranti, Romi, koji iako su na margini, postaju sve značajniji akteri u današnjem društvu. Ovi umjetnički izrazi realizovani su na štampanom platnu i intervencijama na omotima gramofonskih ploča, što dodatno doprinosi jedinstvenosti umjetničkog izražaja autora Sadke Hadžihasanovića.

Ivana Udovičić, kustos Umjetničke galerije BiH, rekla je da je ovo samo jedan dio bogatog opusa umjetničkog stvaralaštva Sadke Hadžihasanovića, istakavši da je riječ o umjetniku koji je postigao veliki uspjeh kako u BiH, tako i šire, te da je on neko ko u svom radu nikada nije napustio ljudsku figuru kao motiv.

„Sadko Hadžihasanović je ime koje je poznato u Sarajevu, u Bosni i Hercegovni i umjetnik koji je nakon rata karijeru nastavio u Kanadi. On je umjetnik koji živi od svog umjetničkog rada, koji je priznat u Bosni i Hercegovini i Kanadi. Ono što bi mogli reći o njegovom radu jeste da je slikar, figurativac i neko ko nikada nije napustio ljudsku figuru kao motiv. Ovdje je prezentiran jedan mali dio kolekcije Umjetničke galerije BiH i to su radovi nastali od 2000. godine do danas. On se kao umjetnik okušao u svim tehnikama, medijima, od slikarstva, skulpture, videoumjetnosti, jako je sklon eksperimentiranju, istraživanju i pokušaju traženja novih mogućnosti slikarstva“, izjavila je Udovičić. Dodala je, da su u Umjetničkoj galeriji BiH veoma ponosni na kolekciju djela Sadke Hadžihasanovića koju posjeduju, počevši od njegovih ranih radova iz 80-ih godina pa sve do danas, pokrivajući tako cjelokupan umjetnički opus ovog istaknutog slikara.

22. 6. 2024.

SPORT

Na Međunarodnom šahovskom turniru nastupilo 73 takmičara

U organizaciji Šahovskog kluba „Alpong“ Novi Grad Sarajevo, a pod pokroviteljstvom Općine Novi Grad Sarajevo, 22. juna 2024. godine održan je Međunarodni šahovski turnir, pod nazivom „NOVOGRADSKI DANI“, posvećen obilježavanju 26. tradicionalne kulturno-sportske manifestacije „Novogradski dani 2024“.

Turnir je održan u Centru za edukaciju, sport i rekreaciju „Safet Zajko“, učestvovalo je 73 šahista, među kojima je bila i jedna šahistkinja. Igralo se po Švicarskom sistemu od 9 kola, po pravilima FIDE, uz tempo igre od 10 minuta po igraču plus 3 sekunde dodatka za svaki odigrani potez. Nakon odigranih 9 kola najuspješniji su bili FM Ismet Burović, GM Emir Dizdarević, FM Muris Konjičanin, FM Senad Kamberović i MK Halim Hutinović sa osvojenih po 7 poena, te FM Efim Muratović i CM Adnan Sitnić sa osvojenih po 6,5 poena, zatim Fahrudin Halilović i IM Rijad Burović sa osvojenih po 6 poena. Njima su pripale redovne nagrade, još 14 igrača je dobilo specijalne nagrade, među kojima je bilo 6 igrača ŠK „Alpong“. Sudijski posao uspješno su obavili IA Mirza Miralem, DA Muharem Višnjic i DA Dario Kureš.





22 - 23. 6. 2024.

SPORT

15. međunarodni bokserski turnir “Novogradski dani” – memorijal “Safet Hadžić”

U okviru manifestacije “Novogradski dani 2024”, 22. i 23. juna 2024. godine je u Centru za edukaciju, sport i rekreaciju “Safet Zajko” održan 15. međunarodni bokserski turnir “Novogradski dani” – memorijal “Safet Hadžić”.

Na turniru su učestvovali bokseri iz Bosne i Hercegovine, Hrvatske i Crne Gore u kategorijama školarci, juniori, mladi i seniori.

U kategoriji školarca (46 kg) snage su odmjerili Emin Omerović i Strahinja Mrdak, a pobjeda je pripala Omeroviću. U kategoriji školarci (57kg) u borbi između Alija Kosovca i Vukojević Petra, bolji je bio Kosovac.

U juniorskoj kategoriji Davud Kočan je odnio pobjedu nad Mihaelom Bulatovićem u kategoriji do 48 kg. Vlad Samarin je bio najbolji u kategoriji do 66 kg, dok je David Mirković slavio u kategoriji do 70 kg.

Allem Merdan je u kategoriji mladih pobijedio Ivana Jukičića u kategoriji do 86 kg.

U seniorskoj kategoriji, Alija Mešić je trijumfovao nad Dimitrijem Milićem u kategoriji više od 92 kg.

Za najboljeg boksera turnira proglašen je Alija Mešić, dok je titulu najperspektivnijeg boksera odnio Ali Kosovac.

Najborbeniji par turnira bili su Muhamed Gakić i Vlad Samarin, a najboljim tehničarem proglašen je Ivan Jukičić.

Od naredne godine, ovaj međunarodni bokserski turnir bit će uvršten u kalendar Evropske bokserske federacije (EUBC), među najelitnije turnire, privlačeći boksera iz svih dijelova Evrope.

Pobjedničkim ekipama uručeni su pehari i medalje.



OPĆINA NOVI GRAD SARAJEVO

26. TRADICIONALNA MANIFESTACIJA
NOVOGRADSKI DANI 2024
od 30. maja do 30. juna

KONCERT NARODNE MUZIKE

ORKESTAR HARISA KALTAKA

Hajrudin Hazre Udvinčić
Amir Begović
Adnan Kuka

14.6. u 20:30 sati
Sportsko rekreativni centar
„Srce“, Buča Potok

OPĆINA NOVI GRAD SARAJEVO

26. TRADICIONALNA MANIFESTACIJA
NOVOGRADSKI DANI 2024
od 30. maja do 30. juna

KONCERT DUHOVNE MUZIKE

Hor "ŠAPAT SRCA"
Hor "HAMZA"

19.6. u 20:30 sati
Centar za edukaciju,
sport i rekreaciju
„Safet Zajko“

BH Folk Fest

26. TRADICIONALNA MANIFESTACIJA
NOVOGRADSKI DANI 2024
od 30. maja do 30. juna

OPĆINA NOVI GRAD SARAJEVO

INTERNACIONALNI FESTIVAL FOLKLORA

Petak-subota, 21.06.-22.06.
u 19 sati
CENTAR ZA EDUKACIJU, SPORT I REKREACIJU
„SAFET ZAJKO“

OPĆINA NOVI GRAD SARAJEVO

26. TRADICIONALNA MANIFESTACIJA
NOVOGRADSKI DANI 2024
od 30. maja do 30. juna

PORODIČNI DAN

Nedjelja, 30. 6. od 17 sati
MANIFESTACIJA ZA CIJELU PORODICU
CENTAR ZA EDUKACIJU, SPORT I REKREACIJU "SAFET ZAJKO"

26. TRADICIONALNA MANIFESTACIJA
NOVOGRADSKI DANI 2024
od 30. maja do 30. juna

6. 6. četvrtak
DJ Amar

Centar za edukaciju, sport i rekreaciju
"Safet Zajko"

**DEFILE MATURANATA
NOVOGRADSKIH OSNOVNIH ŠKOLA**

Polazak u 18:30 sati
ispred zgrade
Općine Novi Grad

OPĆINA NOVI GRAD
SARAJEVO

ŽUČ 2024.
GOLO BRDO

Dan odbrane općine Novi Grad Sarajevo
i bitke za brdo Žuč

Svečano otkrivanje spomenika
"KRILA SLOBODE"

SUBOTA, 8. JUNI, PLATO GOLOG BRDA - ŽUČ
POČETAK PROGRAMA U 14 SATI
CENTRALNA MANIFESTACIJA U 17 SATI

OPĆINA NOVI GRAD
SARAJEVO

26. TRADICIONALNA MANIFESTACIJA
NOVOGRADSKI DANI 2024
od 30. maja do 30. juna

**DŽEJLA
RAMOVIĆ**

20. 6. 2024.
U 20:30
PLATO ISPRED SPORTSKE
DVORANE DOBRINJA

OPĆINA NOVI GRAD
SARAJEVO

DIVANHANĀ

ZAVRZLANA TOUR

29. 6. 2024. U 20:30
CENTAR SAFET ZAJKO

26. TRADICIONALNA MANIFESTACIJA
NOVOGRADSKI DANI 2024
od 30. maja do 30. juna

OPĆINA NOVI GRAD
SARAJEVO

MM. DIVANHANĀ SA
#SIRIHELLOH



26. 6. 2024.

SPORT

31. memorijalni malonogometni turnir u znak sjećanja na "Zlatnog ljiljana" Smaila Smaju Šikala

Na sportskom stadionu Vitkovac, u Boljakovom Potoku održan je tradicionalni 31. memorijalni turnir u malom nogometu "Smail Šikalo". Turnir je održan u okviru manifestacije "Novogradski dani 2024", a u organizaciji Udruženja OFK "Biser 96", u znak sjećanja na komandanta, heroja odbrane i "Zlatnog ljiljana" Smaila Šikala, koji je dao nemjerljiv doprinos u odbrani općine Novi Grad, grada Sarajeva i države BiH od agresora u odbrambeno-oslobodilačkom ratu 1992-1995. godine.

Na početku turnira prisutne je pozdravio načelnik Općine Novi Grad Sarajevo Semir Efendić, ističući značaj sjećanja na heroje odbrane Novog Grada i Bosne i Hercegovine.

"Čast mi je što imam priliku prisustvovati otvaranju 31. memorijalnog turnira u malom nogometu "Smail Šikalo". Ovaj turnir je vjerovatno i najstariji memorijalni turnir u općini Novi Grad koji se sve vrijeme igra na stadionu u Boljakovom Potoku. Drago mi je da čuvamo uspomenu na našeg rahmetli Smaila Šikala, po kojem naša glavna ulica kroz Boljakov Potok nosi ime. Malo je toga što možemo reći o njegovoj hrabrosti, to su ljudi koji su naš grad odbranili. Trudimo se da ih ne

zaboravimo i da na najbolji način memorišemo sjećanje na sve naše heroje kako bi oni bili uzor našim mladim generacijama", rekao je načelnik Efendić.

Predsjednik Udruženja OFK „Biser 96“ Samir Čičak istakao je da se organizacijom ovog turnira djeca upoznaju sa herojima odbrambeno – oslobodilačkog rata i na taj način im odaju počast i brinu se da nikada ne budu zaboravljeni.

Ovom prilikom Čičak je uručio načelniku Semiru Efendiću zahvalnicu za nesebičan doprinos u organizaciji memorijalnog turnira u malom nogometu "Smail Šikalo".

Zahvalnice su uručene i jednom od osnivača kluba i trenutnom predsjedniku Skupštine OFK "Biser 96" Seadu Kusturi, zastupniku u Federalnom parlamentu BiH Enesu Pešteku, vijećniku Općinskog vijeća Novi Grad Sarajevo Jasminu Smječaninu, bivšem predsjedniku OFK "Biser 96" Emiru Čerkezu i MZ "Alipašin Most 1".

Na turniru je igralo 16 ekipa omladinskog pogona dječaka 2015. godište i 16 ekipa veterana.



29. 6. 2024.

KULTURA

Čarobna noć sevdaha u Centru “Safet Zajko” uz grupu Divanhana

U prelijepom ambijentu Centra “Safet Zajko”, u okviru 26. tradicionalne manifestacije “Novogradski dani 2024” održan je veličanstven koncert grupe Divanhana, na kojem je veliki broj ljubitelja sevdaha uživao u zvucima tradicionalne muzike, obojačene modernim muzičkim elementima.

Divanhana je jedna od najpoznatijih bh. grupa, koja tradicionalnim zvukovima sevdaha dodaje dašak savremenih i inovativnih elemenata, stvarajući čaroliju koja već dugi niz godina osvaja srca publike širom svijeta.

Koncert je otvoren sevdalinkom “Vino piju nane age Sarajlije”, nakon čega su uslijedile popularne izvedbe poput “Ciganka sam mala”, “Oj Safete, Sajo Sarajlijo”, “Aj, mene, majka, jednu ima”, “Zvijezda tjera mjeseca” i mnoge druge, a publika je uživala u svakoj minuti koncerta. Njihova muzika, koja spaja prošlost i sadašnjost, očarala je publiku u Centru “Safet Zajko” i učinila ovaj koncert posebnim. Tokom dvosatnog nastupa, publika je pjevala zajedno s Divanhanom, stvarajući nezaboravnu atmosferu ispunjenu ljubavlju prema sevdahu i našoj bogatoj muzičkoj tradiciji.



29 - 30. 6. 2024.

SPORT

Međunarodni teniski turnir „Sarajevo Juniors Open 2024“

Četvrti međunarodni teniski turnir „Sarajevo Juniors Open 2024“ održan je na teniskim terenima Centra “Safet Zajko”. Turnir, koji je bodovan za svjetsku juniorsku rang-listu, održan je u organizaciji Međunarodne teniske federacije (ITF), a prvi put je održan u Novom Gradu.

Na turniru je učestvovalo 128 najboljih juniora i juniorki iz 35 zemalja, uključujući Kinu, Japan, SAD, Veliku Britaniju, Brazil, Argentinu i mnoge druge zemlje svijeta i Evrope.

Turnir je otvorio načelnik Općine Novi Grad Sarajevo Semir Efendić koji je pozdravio prisutne i čestitao Teniskom klubu “Gem” na organizaciji ovog prestižnog takmičenja, istakavši da je ovo prvi put da se u Centru “Safet Zajko” održava teniski turnir na ovom nivou u

kojem učestvuju takmičari iz 35 država svijeta i Evrope..

Prisutnima se obratio i direktor Teniskog kluba “Gem” Aljoša Delić koji rekao da su organizacijom ovog međunarodnog teniskog turnira uspješni dovesti svijet i regiju u Centar “Safet Zajko”.

Direktor Delić je ovom prilikom uručio zahvalnicu načelniku Semiru Efendiću za izuzetan doprinos u razvoju tenisa na području općine Novi Grad Sarajevo. Također, zahvalnica je dodijeljena i direktoru JP “Lokom” d.o.o., Adnanu Šabanoviću.

U glavnom ždrijebu turnira Bosnu i Hercegovinu su predstavljali Ivan Biletić, Matej Đokić, Justin Ilić, Amir Škrijelj, Afan Neković i Amar Silajdžić u muškoj kategoriji, te Alona Brzina, Elena Torbica i Nikolina Kovačević u ženskoj kategoriji.



30. 6. 2024.

KULTURA

Porodični dan ispunjen dječijom igrom, smijehom i zabavom

Zabavom za djecu i roditelje "Porodični dan", sa mnoštvom aktivnosti i sadržaja, koja je održana u parku Centra "Safet Zajko" završen je program 26. manifestacije "Novogradski dani 2024".

Veliki broj porodica uživao je u igrama, plesu i pjesmi, a zabavu je dodatno obogatio veseli čas sa Kiketom i nastup plesnog kluba Bolero.

Općina Novi Grad Sarajevo već nekoliko godina organizuje "Porodični dan", za najmlađe sugrađane koji imaju priliku da uživaju u bogatim sadržajima i zabavi. Osim igre i plesa, djeca su imala priliku da učestvuju u kreativnim radionicama i sportskim aktivnostima.

U okviru programa djeca su uživala i u face paintingu, kutku za igru

sa kinetičkim pijeskom, infinity borbi sa specijalnim mačevima za dječake, te u druženju sa maskotama Spidermana i Marshalla iz Paw Patrola.

Posebno zanimanje mališana izazvalo je takmičenje u šutiranju na gol, gdje su djeca imala priliku da pokažu svoje vještine u postizanju pogodaka. Najuspješniji strijelci, koji su uspjeli postići 50 golova, osvojili su smart ball, loptu koja sama broji udarce. Djeca su imala priliku uživati i u go-cart areni, umjetničkom kutku za pravljenje nakita od perlica i slikanju u ateljeu. Bazen sa lopticama je bio još jedna od atrakcija, gdje je animatorica sakrila nekoliko loptica sa nagradama koje su djeca tražila, dok su bebe uživale u igri sa lopticama.



31. 5. 2024.

KULTURA

Poema “Havo majko koliko ti je srce”

Izvedbom poeme “Hava majko, koliko ti je srce”, autora Sabita Bekte, u petak 31. maja 2024. godine, otvorena je 26. manifestacija “Novogradski dani”. Poema je izvedena u multimedijalnoj sali Općine Novi Grad Sarajevo na Dan bijelih traka, dan sjećanja na ubijene Prijedorčane za vrijeme agresije na Bosnu i Hercegovinu.

Poema je posvećena Havi Tatarević iz Prijedora, hrabroj majci kojoj su tokom proteklog rata srpski agresori ubili šest sinova i muža. Njeni najmiliji mučki su ubijeni, a posmrtno ostatke pronašla je nakon 20 godina u Tomašici, najvećoj masovnoj grobnici u BiH.

Autor poeme Sabit Bekto, bivši logoraš koji je preživio torture u prijedorskim logorima, istakao je svoju posvećenost pisanju i prenošenju sjećanja na mlade generacije, kako bi se zapamtila strahota proteklog rata u BiH. Događaju su osim predstavnika Općine Novi Grad Sarajevo prisustvovali predstavnici Općinskog vijeća Novi Grad, Memorijalnog centra KS, kao i brojni građani koji su na taj način odali počast svim ubijenim i nestalima u Prijedoru i cijeloj BiH.

U programu su učestvovali profesorica dramskih umjetnosti i glumica Narodnog pozorišta Minka Muftić, glumica Narodnog pozorišta Belma Salkunić, tenor Sarajevske opere Ileš Bechei, te profesor Muzičke akademije Elvir Solak, Gordan Simić uradio je scenarij i režiju.



1. 6. 2024.

OBILJEŽAVANJA

Masakr na Dobrinji, ubijeni za vrijeme bajramskog turnira

Na parking prostoru u ulici Trg djece Dobrinje, 1. juna 2024. godine obilježena je 31. godišnjica masakra počinjenog nad civilima za vrijeme održavanja bajramskog turnira 01. juna 1993. godine.

Tog dana 1993. godine, na parkingu na kojem se igrao bajramski turnir, pale su dvije minobacačke granate ispaljene sa agresorskih položaja tzv. vojske RS koje su usmrtile 15, a ranile više od 100 građana.

Na mjestu masakra cvijeće su položile brojne delegacije i odale počast ubijenim sugrađanima.

Tog dana ubijeni su: Atif Bajraktarević, Mirza Deljković, Alija Godinjak, Alija Gojak, Adnan Mirvić, Kemal Mulaahmetović, Dragan Osadčij, Refik Ramić, Jusuf Razić, Munir Sabanić, Adel Selmanović, Danijel Šolaja, Damir Trebo, Asim Zagorica i Marko Žižić.



2. 6. 2024.

OBILJEŽAVANJA

Sjećanje na dane kada su protjerivani, zarobljavani i ubijani mještani Ahatovića i Dobroševića

Kod spomen-obilježja šehidima i poginulim borcima u dvorištu OŠ "Mustafa Busuladžić", u Dobroševićima, 02. juna 2024. godine, obilježena je 32. godišnjica formiranja prvog logora na području općine Novi Grad i stradanja nedužnih civila iz Ahatovića i Dobroševića.

Učenjem Fatihe i polaganjem cvijeća, brojne delegacije, predstavnici boračkih udruženja, porodice poginulih boraca Armije RBiH, porodice ubijenih civila, bivši logoraši, prijatelji i građani odali su počast nevinim građanima koji su odvedeni u logore, a potom krvnički ubijeni.

Mještani Ahatovića i Dobroševića su 1992. godine nasilno odvedeni iz svojih kuća u logore kao što su Kisikana, Mali Hangar, Veliki Hangar. Kisikana je bila najveći logor u kojem su uhapšene i ubijene 243 osobe.

Predsjednik Udruženja logoraša i logorašica Novi Grad Ismet Salihagić, koji je i sam bio logoraš i preživio najveću torturu u logorima Lukavica i Pale sa svojih 22 godine života, naglasio je važnost i obavezu da priča se priča o ovim događajima, posebno djeci, kako nam se više nikada ne bi dogodili slični zločini.

Mjesec juni je bio jedan od najkrvavijih mjeseci za vrijeme agresije na našu domovinu. Lijepi i sunčani dani za građane Novog Grada, Sarajeva i cijele BiH postali su dani kada je naš narod proživljavao najveće zločine nad čovjekom u modernoj historiji. Danas, kada se sjećamo svih onih koji nisu sa nama, šaljemo poruku da nikada nećemo zaboraviti i da ćemo njegovati kulturu sjećanja i podsjećati na strahote kroz koje je naš narod prošao, poručeno je sa skupa u Dobroševićima.



4. 6. 2024.

OBILJEŽAVANJA

Godišnjica pogibije braće Fikreta i Safeta Kadića

Predstavnici Općine Novi Grad Sarajevo zajedno sa boračkim organizacijama, članovima porodice, prijateljima i saborcima rahmetli braće Fikreta i Safeta Kadića, obilježili su 04. juna 2024. godine, godišnjicu pogibije dvojice istaknutih boraca Armije RBiH.

Braća Kadić su 1992. godine poginuli na cesti kod nekadašnje „Božića pumpe“ u novogradskom naselju Briješće.

Rifat Kadić, brat Fikreta i Safeta sa mnogo emocija govorio je o braći, istakavši da je tuga velika bila kada su poginuli, ali i danas, 32 godine poslije.

„Vrlo je teško, velike su emocije i tada bile kada su poginuli, ali i sada i stvarno je teško. Majka nam je prije pet godina preselila i sada je ta bol i tuga još veća. Mnogo toga smo prošli zajedno, moja braća i ja, a najviše se sjećam sportskih takmičenja i putovnja na koja smo skupa išli“, rekao je Rifet.

Hamid Guska, nekadašnji trener bokaškog kluba „Željezničar“ u kojem su trenirala braća Kadić kazao je da su Fikret i Safet bili momci koji mogu poslužiti kao najbolji primjer mladim generacijama. „Bili su odani, spremni da se žrtvuju za ekipu, imali su poštovanje svih i njih dvojica mogu biti najbolji primjer i uzor mladim generacijama“, rekao je Guska.



6. 6. 2024.

OBILJEŽAVANJA

Omladinski malonogometni turnir za sjećanje na 25 ubijene djece sa područja MZ „Alipašin Most 1“

Na sportskom igralištu, u ulici Potur Šahidijina, na Vitkovcu 06. juna 2024. godine, održan je omladinski malonogometni turnir za sjećanje na dvadesetpetero djece koja su ubijena za vrijeme agresije na Bosnu i Hercegovinu u periodu 1992-1995. sa područja MZ „Alipašin Most 1“.

Bio je to četvrti po redu turnir koji je organiziran uz podršku Općine Novi Grad Sarajevo, a u saradnji sa „Udruženjem roditelja ubijene djece opkoljenog Sarajeva 1992-1995.“ i dio je programa tradicionalne manifestacije „Novogradski dani 2024“.

Na turniru je nastupilo oko 130 djece iz četiri novogradske osnovne škole, „Avdo Smailović“, „Sokolje“, „Umihana Čuvidina“ i „Behaudin Selmanović“.

Prije otvaranja turnira, porodice poginule djece, komšije, prijatelji, predstavnici MZ „Alipašin most 1“ te predstavnici „Udruženja roditelja

ubijene djece opkoljenog Sarajeva“, učenjem Fatihe i polaganjem cvijeća na spomen-obilježju na kojem su ispisana imena djece, odali su počast najmlađim žrtvama agresije na našu domovinu.

Turnir je otvorio predsjednik „Udruženja roditelja ubijene djece opkoljenog Sarajeva 1992-1995.“ Fikret Grabovica, koji je istakao značaj kulture sjećanja i obilježavanja ovakvih i sličnih događaja koji su se desili za vrijeme agresije na BiH.

Otac trinaestogodišnjeg Admira Holjana, koji je ubijen 1992. godine, sa tugom i bolom govorio je o sinu, ali i o ostaloj djeci koja su nevino stradala tokom rata. Ramiz Holjan je rekao da je sretan kada vidi djecu koja svake godine dolaze da odaju počast onima koji nisu doživjeli da odrastu, ali i tužan zbog svega što smo proživjeli u periodu agresije na BiH.



8. 6. 2024.

Na Golom Brdu, na Žuči "otvoren" veličanstveni spomenik 'Kрила slobode'

Na Dan odbrane općine Novi Grad Sarajevo, 8. juna 2024. godine, ozvaničena je izgradnja spomenika Krila slobode. Na Golom Brdu, gdje su se uzdigla 'Krila slobode', okupile su se hiljade ljudi kako bi prisustvovala svečanom činu "otvaranja" monumentalnog spomenika podignutog u čast najhrabrijim sinovima naše domovine, onima koji su svojim životima branili i odbranili Bosnu i Hercegovinu od agresora. Završetak izgradnje spomenika herojima i pobjedi na brdu Žuč, uz zvuke ispaljenih kometa i stotinu bijelih golubova, ozvaničio je načelnik Semir Efendić, sa željom da na 'krilima slobode' rastu naše generacije koje će biti spremne da grade i čuvaju državu Bosnu i Hercegovinu.

Manifestaciji su prisustvovala mnogobrojne porodice naših časnih šehida, poginulih boraca, demobilisanih boraca, armijski generali, pripadnici boračkih brigada iz cijele Bosne i Hercegovine, predstavnici državnih, federalnih, kantonalnih, gradskih, općinskih, kulturnih, obrazovnih i vjerskih institucija sa šireg područja BiH, privrednih subjekata i poslovnih partnera, te građani.

Prisutnima su se obratili član Predsjedništva BiH, 'zlatni ljiljan' Željko Komšić, Omer Osmanović, ministar za boračka pitanja KS, načelnik Općine Novi Grad i domaćin manifestacije Semir Efendić, predsjedavajući Općinskog vijeća Novi Grad Mirza Selimbegović i profesor Emir Salihović, tvorac idejnog rješenja 'Krila slobode'.

Uručena priznanja "Zlatna plaketa odbrane općine Novi Grad Sarajevo"

Na manifestaciji obilježavanja Dana odbrane i pobjede na brdu Žuč uručena su općinska priznanja pojedinačna i kolektivna "Zlatna plaketa odbrane općine Novi Grad Sarajevo". Priznanje je posthumno dodijeljeno Dervišu Sudi Vražalici, Džemalu Selmanoviću i Čamilu Zimiću za izuzetne zasluge u odbrani općine Novi Grad Sarajevo i Bosne i Hercegovine u odbrambeno – oslobodilačkom ratu 1992-1995. godine.

Pojedinačna priznanja "Zlatna plaketa" dodijeljena je Mehmedu Baltiću, Hamidu Dudi i Hamzi Zorniću za doprinos koji su dali u toku odbrambeno – oslobodilačkog rata 1992-1995. godine.

Kolektivne zlatne plakete dodijeljene su Mješovitom artiljerijskom divizionu – MAD Druge viteške brigade i FIVA TV.



Semir Efendić: "Neka na krilima slobode rastu naše generacije koje će biti spremne da grade i čuvaju državu Bosnu i Hercegovinu!"





Prije održavanja manifestacije, u prijepodnevni satima, članovi Udruženja "Maloljetni borci Armije RBiH Općine Novi Grad Sarajevo", njihovi saborci, članovi porodica i prijatelji okupili su se ispred Centralnog spomen-obilježja šehidima i poginulim borcima Armije MUP-a RBiH, kod zgrade Općine, odakle su nakon odavanja počasti poginulim borcima, krenuli u pohod na brdo Žuč. Pohod je nosio naziv "PUTEM NOVOGRADSKIH BRANILACA". Na taj način učesnici pohoda, odali su priznanje svima onima koji su položili živote braneći svoj grad i domovinu od agresora i prisustvom uveličali manifestaciju obilježavanja Dana odbrane općine Novi Grad Sarajevo.

11. 6. 2024.

OBILJEŽAVANJA

Sjećanjem na hrabre borce Armije RBiH obilježena 32. godišnjica bitke za odbranu brda Mojmilo

Polaganjem cvijeća i učenjem Fatihe na spomen-obilježju poginulim šehidima i borcima kod Eko-kuće na Mojmilu, te obilaskom drugih lokacija na kojima su vođene borbe za odbranu brda Mojmila i vodovoda, 11. juna 2024. godine, obilježena je 32. godišnjica jedne od najznačajnijih bitaka za odbranu Sarajeva i BiH od agresora.

Bitka za odbranu brda Mojmilo jedna je od najznačajnijih bitaka koje su vođene na prostoru Novog Grada za vrijeme agresije na BiH. U periodu agresije 1992 -1995. godine brdo Mojmilo je predstavljalo važnu kotu u odbrani Novog Grada i Sarajeva. Agresor je htio da zauzimanjem ovog važnog mjesta stavi pod kontrolu grad i na taj način olakša svoj put ka zauzimanju i drugih dijelova Novog Grada i Sarajeva. Međutim, iako bez adekvatnog naoružanja, mladi i hrabri borci naše domovine to nisu dozvolili. Herojska borba pripadnika 101. brigade, specijalne jedinice MUP-a "Lasta" i jedinice Teritorijalne odbrane odbranila je Mojmilo.

Mojmilo je dalo mnoge heroje za slobodnu Bosnu i Hercegovinu, uključujući komandante Ramiza Salčina i Safeta Hadžića.

Predsjednik Udruženja 101. motorizovane brigade, Bajro Čomor, istakao je da bi bilo mnogo teže odbraniti i Novi Grad i Sarajevo da se nije Mojmilo odbranilo od neprijateljskih snaga.

U sklopu obilježavanja ovog značajnog datuma, predstavnici Udruženja 101. Brigade, saborci i prijatelji, obišli su mezarje komandanta MAD-a, spomen-obilježje u Olimpijskom Naselju, spomen-obilježje poginulim Romima. Time su obilježene bitke koje su se dogodile od marta do kraja juna 1992. godine.

Cvijeće je položeno i na Centralnom spomen-obilježju kod zgrade Općine Novi Grad, spomen-obilježju borcima romske nacionalnosti, te na spomen-obilježju šehidima, poginulim borcima i civilnim žrtvama rata u spomen-parku MZ "Olimpijsko Selo", na spomen-obilježju pored fontane u Brčanskoj ulici, kao i na spomen-obilježju Nadiru Kafedžiću i njegovom saborcima.

Počast poginulim borcima i šehidima odale su delegacije Općine Novi Grad Sarajevo, Općinskog vijeća Novi Grad, Vlade KS, predstavnici Udruženja 101. brigade, Koordinacija boračkih udruženja Novi Grad, učenici OŠ "Aneks", saborci, prijatelji i građani.

12. 6. 2024.

OBILJEŽAVANJA

31 godina od bitke za Mijatovića Kosu i pogibije "Zlatnog ljiljana" Safeta Isovića -Tigra sa Žuči

Na spomen-obilježju, na mjestu gdje je rahmetli Safet Isović položio svoj život za domovinu, 12. juna 2024. godine, je obilježena 31. godišnjica bitke za oslobađanje Mijatovića Kose i pogibije "Zlatnog ljiljana" i zamjenika komandanta 2. viteške motorizovane brigade.

Članovi porodice, bivši saborci, predstavnici vlasti i građani okupili su se kako bi se prisjetili hrabrosti i predanosti heroja Safeta Isovića i odali mu počast.

10. juna 1993. godine Safet Isović, predvodio je borce u akciji oslobađanja Mijatovića Kose u kojoj je oko 120 boraca uspjelo osloboditi ovo strateški važno područje, odakle su neprijateljske snage izvodile napade na novogradska naselja. Nažalost, tog dana Safet Isović, poznat među borcima kao Tigar sa Žuči, izgubio je život od minobacačke granate. Poginuo je usred oslobađanja Mijatovića Kose sa nepunih 27 godina, nedečakavši vijest o konačnom uspjehu operacije. Njegova žrtva i hrabrost ostaju trajni simbol borbe za slobodu i odbranu Bosne i Hercegovine od agresije.

Safetov sin Adi Isović poručio je da trebamo učiti našu djecu o herojima koji su odbranili Bosnu i Hercegovinu, naglasivši da je to naša dužnost i obaveza.

„Iako je prošla 31 godina od dana pogibije mog rahmetli oca Safeta Isovića, mi se danas možda više nego ikada prije, sjećamo njega i ponosimo se njegovim djelima. Sa nepunih 27 godina, on je svoj život položio na prvim linijama odbrane, u akciji među svojim najhrabrijim i najodvažnijim saborcima. Mi smo dužni da svojoj djeci i mladim generacijama pričamo o herojstvu onih koji su onda kada je bilo najteže, ali i najpotrebnije, bili tu i odbranili našu domovinu - Bosnu i Hercegovinu“, rekao je Adi.

Prisutni su se učenjem Fatihe prisjetili i odali počast i Salko Muraspahiću, zamjeniku komandanta Druge viteške motorizovane brigade, koji je poginuo 28. jula 1993. godine i njegovim saborcima.



13. 6. 2024.

OBILJEŽAVANJA

Formiranje Patriotske lige Novi Grad

U multimedijalnoj sali Općine Novi Grad 13. juna 2024. godine, održana je svečana akademija povodom 33. godišnjice formiranja Patriotske lige Novi Grad. Ovaj važan događaj okupio je brojne zvanice, članove Patriotske lige, porodice poginulih boraca, predstavnike vlasti, te brojne građane koji su došli da odaju počast hrabrim braniocima naše zemlje i obilježe godišnjicu nastanka Patriotske lige.

Patriotska liga Novi Grad Sarajevo imala je ključnu ulogu u organizaciji i vođenju odbrane ovog dijela glavnog grada za vrijeme agresije 1992-1995. godine. Kao odgovor na rastuće tenzije i prijetnje, okupljali su patriotski orijentisane građane spremne da brane suverenitet i teritorijalni integritet Bosne i Hercegovine. Bila je to prva organizirana snaga koja se pripremala za odbranu od agresije. U tadašnjem Domu milicije 10. juna 1991. godine formiran je Savjet za nacionalnu odbranu od sedam članova. Tada Krizni štab odbrane grada Sarajeva preuzima naziv Patriotska liga regije Sarajeva.

Općina Novi Grad ima dva narodna heroja Safeta Hadžića i Safeta Zajku, a tada je imala četiri ratne brigade i Policijsku upravu. U svim tim brigadama je djelovala i bila prisutna Patriotska liga, koja je odigrala veliku ulogu u odbrani općine Novi Grad Sarajevo i države BiH od agresora.

Načelnik Općine Novi Grad Sarajevo Semir Efendić rekao je, da je nemoguće naglasiti značaj Patriotske lige i njene uloge u odbrambeno – oslobodilačkom ratu i istakao, da ne postoji ništa važnije od toga da budemo svjesni vrijednosti odbrane ove zemlje i da moramo biti uvijek spremni da je branimo i biti budni kako bi mogli na vrijeme da reagujemo.

Na manifestaciji obilježavanja Dana Patriotske lige održan je i čas historije o nastanku, historiji Patriotske lige i njenom značaju u odbrani naše domovine.

Program je obogaćen i nastupima Kulturno-umjetničkog društva "Dobrinja 93", kao i recitalom učenika OŠ "Skender Kulenović", koji su svojim izvedbama dodatno uljepšali događaj i odali počast hrabrim borcima Patriotske lige.

Na kraju su dodijeljene plakete posthumno članovima Patriotske lige, kao i plakete za žive članove, te plakete za institucije, organizacije,

kompanije i udruženja koji pružaju finansijsku podršku Udruženju Patriotska liga Novi Grad.

Patriotska liga Novi Grad Sarajevo je, uz veliki doprinos svojih članova, odigrala ključnu ulogu u očuvanju teritorijalnog integriteta i suvereniteta Bosne i Hercegovine.



14. 6. 2024.

OBILJEŽAVANJA

Masakr u 'autobusu smrti' u Sokolini, sjećanje na 48 žrtava Ahatovića

14. juna 2024. godine, u mjestu Sokolina kod Ilijaša obilježena je još jedna tužna godišnjica svirepog ubistva 48 nevinih stanovnika Ahatovića, Dobroševića i Bojnika, kao i 18 šehida ubijenih u mjestu Ranovača.

Zločin u Sokolini jedan je od najstrašnijih i najpotresnijih koji su se desili za vrijeme agresije na našu domovinu. Dana 14. juna 1992. godine, zrak je bio ispunjen mirisom baruta, krvi i tijela ubijenih Bošnjaka. Zločincima nije bilo dovoljno da provode maltretiranje i torturu u logorima, željeli su potpuno uništiti i etnički očistiti cijeli jedan narod.

Nakon što su istjerani iz svojih domova, opljačkani, poniženi i gotovo nasmrtno pretučeni, 56 nevinih civila, mladih ljudi od 18 do 40 godina, svirepo je ubijeno. Rečeno im je da idu na razmjenu, ali nisu ni slutili da će taj junski dan i vožnja u autobusu smrti za većinu njih biti posljednja. Agresor nije oklijevao, bez savjesti i monstrozno, na njih 56 u malom autobusu ispalili su granate, projekte i bombe. Od 56 zarobljenika, osam ih je preživjelo.

Elvir Jahić, tada devetnaestogodišnjak, jedan je od preživjelih ovog strašnog zločina. Danas, kao i prethodnih godina, bio je tu, u Sokolini, pored olupine autobusa u kojem su njegovi prijatelji i komšije ubijeni. Nije mu bilo jednostavno prisjećati se svega što se dogodilo taj dan, ali kaže da zbog djece koja su došla da odaju počast poginulim, svake godine smogne snage da dođe i kao živi svjedok i preživjeli priča o tome.

Prisutnima se obratio i predsjedavajući Općinskog vijeća Novi Grad Mirza Selimbegović, istakavši da ne smijemo nikada zaboraviti niti jedan zločin i da trebamo biti spremni da poduzmemo sve, da nam se prošlost ne ponovi.

Na mjestu zločina okupile su se brojne delegacije, članovi porodica, saborci i komšije ubijenih mještana Ahatovića, Dobroševića i Bojnika, boračkih udruženja, te učenici i nastavnici Osnovne škole „Mustafa Busuladžić“ iz Dobroševića, a učenici sedmog razreda ove škole izveli su recitale.

Položeno je cvijeće i proučena Fatiha nevino ubijenim građanima. Nakon polaganja cvijeća i učenja Fatihe kod spomen-obilježja Sokolina, brojne delegacije odale su počast i na spomen-obilježju kod OŠ "Mustafa Busuladžić", te žrtvama ubijenim u masovnoj grobnici u selu Ravne i na brdu Ranovača, gdje je 2. juna 1992. poginulo 18 boraca Armije RBiH.





„Kрила slobode”

14. 6. 2024.

OBILJEŽAVANJA

Heroj Safet Zajko i njegovi saborci smibol su Novog Grada

U multimedijalnoj sali Općine Novi Grad Sarajevo održana je akademija posvećena najhrabrijim borcima i herojima sa Žuči, Safetu Zajki, Safetu Isoviću i Salki Muraspahiću. Akademija je upriličena na Dan pogibije "zlatnog ljiljana", heroja odbrambeno-oslobodilačkog rata rahmetli Safeta Zajke, koji je poginuo 17. juna 1993. godine na Mijatovića Kosi.

Akademiji su prisustvovala porodice šehida i poginulih boraca Armije RBiH i MUP-a BiH, demobilizirani borci, zlatni ljiljani, ratni vojni invalidi, armijski generali i ratni komandanti, pripadnici viteških brigada sa šireg područja BiH, predstavnici izvršne i zakonodavne vlasti, sa federalnog, kantonalnog, gradskog i lokalnog nivoa, načelnik Općine Novi Grad Sarajevo Semir Efendić, predsjedavajući Općinskog vijeća Novi Grad Mirza Selimbegović i vijećnici OV Novi Grad, te građani. Na samom početku akademije održan je historijski čas o herojima sa Žuči. O njihovoj požrtvovanosti i hrabrosti govorio je ratni komandant 3. motorizovanog bataljona Druge viteške motorizovane brigade Muaz Suljagić.

Heroji, gazije, borci, 'zlatni ljiljani', Safet Zajko, Safet Isović i Salko Muraspahić dali su ono najvrijednije za našu domovinu, svoje živote. Safet Zajko je rođen 1. marta 1959. godine u selu Gaočić kod Rudog. Bio je komandant 2. viteške motorizovane brigade, heroj odbrambeno-oslobodilačkog rata, dobitnik najvećeg ratnog priznanja "Zlatni ljiljan", simbol hrabrosti, nepokolebljivosti i neustrašivosti. Njegova predanost domovini i borba za svoj narod zauvijek će ostati

zapamćena, a njegovo ime vječno će se spominjati. Poginuo je na današnji dan 1993. godine na Mijatovića Kosi.

Safet Isović zamjenik komandanta Safeta Zajke, rođen je 06. marta 1966. godine. Isticao se svojom izuzetnom strategijskom vizijom, brzinom u donošenju odluka i natprosječnom inteligencijom. Njegova uloga u planiranju i izvođenju vojnih akcija bila je od presudnog značaja za efikasnu odbranu Novog Grada i Sarajeva. Rahmetli Safet Isović poginuo je na dan oslobađanja Mijatovića Kose, 12. juna 1993. godine, samo pet dana prije svog komandanta i saborca Safeta Zajke. Odlikovao je odlikovanjem "Orden sa zlatnim mačevima", dobitnik najvećeg ratnog priznanja "Zlatni ljiljan".

Salko Muraspahić, zamjenik komandanta brigade, imenovan na tu dužnost nakon pogibije Safeta Isovića. Poginuo je 28.07.1993. godine u rejonu Smiljevića, u podnožju Mijatovića Kose. Dobitnik je najvećeg priznanja "Zlatni ljiljan", poznat po svojoj neumornoj predanosti domovini, bio je istinski borac koji je svoj život posvetio odbrani i slobodi Novog Grada, Sarajeva i Bosne i Hercegovine. Njegova hrabrost i žrtva ostaju trajni simbol patriotizma i nesebične ljubavi prema domovini.

Njihov zajednički doprinos tokom ratnih godina ostaje neizbrisiv u pamćenju i srcima svih građana.

Prije svečane akademije delegacije su položile cvijeće i odale počat herojima odbrane BiH na Centralnom spomen-obilježju ispred zgrade Općine Novi Grad Sarajevo, posjetili mezarja i mjesta pogibije Safeta Zajke.



16. 6. 2024.

OBILJEŽAVANJA

Sjećanje na borce i civile poginule na „Dobrinjskoj barikadi života i smrti“

Dan sjećanja na borce i civile koji su poginuli na "Dobrinjskoj barikadi života i smrti" u periodu agresije na Republiku Bosnu i Hercegovinu, obilježen je 16. juna 2024. godine, polaganjem cvijeća na mjestu gdje je planirana izgradnja spomen-obilježja, kod SOS Dječijeg sela na Mojmilu.

Na tom mjestu predstavnici Općine Novi Grad Sarajevo, Grada Sarajeva, Udruženja "1. dobrinjska brigada", Udruženje "101 brigada" Sarajevo, predstavnici boračkih udruženja, odali su počast ubijenim sugrađanima za vrijeme opsade Dobrinje.

Nosilac ove aktivnosti bilo je Udruženje "1. dobrinjska brigada". Na lokaciji kod kružnog toka na Mojmilu predviđena je izgradnja novog spomen-obilježja za sve građane koji su izgubili živote na Dobrinji za vrijeme agresije na našu zemlju.



17. 6. 2024.

OBILJEŽAVANJA

Dan logoraša Općine Novi Grad Sarajevo

Predstavnici Općine Novi Grad Sarajevo, boračkih udruženja, preživjeli logoraši, članovi porodica, rodbina i prijatelji ubijenih stanovnika Aerodromskog Naselja obilježili su 31. godišnjicu stradanja komšija i Dan logoraša Općine Novi Grad. Polaganjem cvijeća, učenjem Fatihe i minutom šutnje odata je počast svim ubijenim logorašima i poginulim civilima Aerodromskog Naselja. Obilježavanje je održano u organizaciji Udruženja logoraša i logorašica Općine Novi Grad Sarajevo i uz podršku Općine Novi Grad Sarajevo.



21. 6. 2024.

OBILJEŽAVANJA

32. godišnjica bitke za odbranu Dobrinje i Aerodromskog Naselja od agresora

Polaganjem cvijeća i učenjem Fatihe na spomen-obilježju u ulici Habibe Stočević obilježena je 32. godišnjica bitke za odbranu Dobrinje i Aerodromskog naselja od agresora.

Nakon što je 13. i 14. maja 1992. godine iz Dobrinje iseljeno oko 4.000 mještana, već narednog dana počelo je neprekidno granatiranje ovog naselja. Od tada, pa sve do 21. juna 1992. godine, kada se desila presudna bitka za odbranu ovog naselja, Dobrinja je bila pod stalnim napadima. 21. juni bio je sudbonosan za Dobrinju. Branioci Dobrinje zajedno sa specijalcima uspjeli su slomiti srpsku okupaciju i odbraniti ovo naselje.

Ratni komandant i predsjednik Udruženja Prve dobrinjske brigade, Denis Muminović, istakao je da su heroji Dobrinje svi Dobrinjci. "Ovaj datum je za nas Dobrinjce najznačajniji. Ovdje smo da se sjetimo šta se dešavalo u naselju Dobrinja i naselju C5. Kada bi me neko pitao ko je heroj Dobrinje, odgovor bi bio da su to Dobrinjci. Jer svi Dobrinjci su u ratu bili heroji," rekao je Muminović.

Klaphuz Zufer, komandant Trećeg dobrinjskog bataljona, naglasio

je važnost bitki koje su se odvijale između 17. i 21. juna, ističući da su one bile ključne ne samo za Dobrinju nego i za cijelo Sarajevo. "Ova bitka je bila nastavak sukoba koji je počeo 17. juna napadom na Aerodromsko naselje, gdje su agresori uspjeli da nas potisnu do ovdje. Ovdje smo ih zaustavili oklopom, uništavajući tenk i transporter. Ovo je majka svih bitaka za odbranu Dobrinje, a možda i grada Sarajeva. Ljudi koji su poginuli ovdje su stradali u ta tri-četiri dana borbe, a bilo je i više od pedeset poginulih civila te više od stotinu ranjenih. Mi, Dobrinjci smatramo da je ovo alfa i omega bitka. Trudimo se da se sjećamo i obilježavamo ove događaje, i drago nam je da dolaze djeca," rekao je Zufer.

Delegacije su u okviru obilježavanja položile cvijeće i odale počast i na spomen-obilježje na mjestu masakra u ulici Hakiye Turajlića, šehidskom mezarju u naselju Dobrinja, kod džamije u Mahali, te na Centralnom spomen-obilježju na Dobrinji.



24. 6. 2024.

OBILJEŽAVANJA

Sjećanje na heroje odbrane i 'zlatne ljiljane' Derviša Sudu Vražalicu i Muzafera Mešića

Na spomen-obilježju i šehidskom mezarju u Buča Potoku obilježena je 31. godišnjica pogibije heroja odbrambeno – oslobodilačkog rata 1992-1995. godine, boraca 2. viteške motorizovane brigade Derviša Vražalice i Muzafera Mešića.

Mjesec juni 1993. godine je za pripadnike 2. viteške motorizovane brigade bio jedan od najtežih mjeseci. U bici za Mijatovića Kosu 12. juna 1993. godine, poginuo je heroj Safet Isović, a samo pet dana poslije i komandant Safet Zajko. Nakon sedam dana, 24. juna. 1993. godine prilikom utvrđivanja linije odbrane na Mijatovića Kosi, poginuli su i Muzafer Mešić komandant bataljona 2. viteške brigade i Derviš Vražalica komandir čete prvog bataljona 2. viteške brigade. Gubici su bili veliki, ali ostao je ponos na hrabru žrtvu i borbu branitelja 2.

viteške motorizovane brigade.

Esad Hećo komandant prvog bataljona 2. viteške motorizovane brigade svjedok je onoga što se desilo na današnji dan prije 31 godinu. I ove godine, kao i svake prethodne, bio je tu da oda počast svojim hrabrim saborcima i podsjeti na njihovu žrtvu i doprinos u odbrambeno – oslobodilačkom ratu.

Počast poginulim borcima 2. viteške motorizovane brigade odali su članovi porodica Mešić i Vražalica, delegacija Općine Novi Grad Sarajevo, vijećnici Općinskog vijeća Novi Grad sa predsjedavajućim OV, predstavnici Udruženja 2. viteška motorizovana brigada, predstavnici Koordinacije boračkih udruženja Novi Grad, saborci i prijatelji.





**OPĆINA NOVI GRAD
SARAJEVO**

E-UVJERENJA

Nova usluga za građane

Vaše zahtjeve za izdavanje uvjerenja i potvrda od sada možete podnijeti i putem web stranice Općine Novi Grad Sarajevo



<https://www.novigradsarajevo.ba/euvjerenja/>

